

आकाशवाणीखबरां

1. प्रधानमंत्री नरेंद्र मोदी होरें आखेआ ऐ जे ब्रिक्स च ग्लोबल साउथ दे मुलखें दा भरोसा बधेआ ऐ।
2. प्रधानमंत्री नरेंद्र मोदी होरें ब्रिक्स शिखर सम्मेलन दुरान मिस्र दे राष्ट्रपति अब्देल फतह अल सीसी हुंदे कन्नै दपक्खी बैठक कीती।
3. भारती रेलवे नै अगस्त-2026 च माल ढोआई च 5 अशारिया 4 फीसद दा बाद्दा दर्ज कीता ऐ।
4. गुजरात दे उकाई इलाके च 11 इंच थमां बद्द बरखा दर्ज कीती गेई।
5. इंडोनेशिया च अज्ज 240 थमां बद्द लोकें गी लेइयै जा करदी इक फेरी पुट्टी होने कन्नै तकरीबन 140 यात्री ते चालक दल दे सदस्य लापता।
6. महिला क्रिकेट च दुबई च टी-20 एशिया कप दे फाइनल मकाबले च भारत दा मुकाबला मौजूदा चैंपियन श्रीलंका कन्नै होग।

<><><><><>

PM-BRICS

प्रधानमंत्री नरेंद्र मोदी होरें अज्ज आखेआ जे ग्लोबल साउथ मुलखें दा ब्रिक्स उप्पर भरोसा बधेआ ऐ कीजे उंदी आवाज इत्थे सुनी जंदी ऐ ते उंदे तजुबे दा सम्मान कीता जंदा ऐ। उनें आखेआ जे ब्रिक्स दी असली ताकत विविधता ते सहयोग च ऐ। नमीं दिल्ली दे भारत मंडपम च ब्रिक्स शिखर सम्मेलन दे ओपन सैशन गी संबोधित करदे होई प्रधानमंत्री मोदी होरें आखेआ जे महामार, जलवायु आपदा ते सप्लाई चेन च आए दे विघ्नें एह साफ करी दित्ता ऐ जे अज्ज दी आपस च जुडी दी दुनिया च कोई बी मुसीबत शडी इक खेत्तर तगर सीमित नेई रौहंदी ऐ। प्रधानमंत्री होरें आखेआ जे इस करियै ब्रिक्स मुलखें समूह दे अंदर लचीलापन बधाने उप्पर खासा जोर दित्ता ऐ। प्रधानमंत्री होरें चेतावनी दित्ती ऐ जे तकनीक ते जरूरी खनिजें दे हथियारकरण कन्नै तरक्की दे रस्ते च रुकावट पैदा होई सकदी ऐ। प्रधानमंत्री होरें आखेआ जे निक्के ते दरम्याने उद्यमों गी ज्ञान, वित्त ते नमों बजारें कन्नै जोड़ने आस्तै ब्रिक्स-एम.एस.एम.ई सहयोग पोर्टल स्थापित करने दा प्रस्ताव रक्खेआ गेआ ऐ। श्री मोदी होरें आखेआ जे स्मार्ट ग्रिड्स ते एनर्जी स्टोरेज एक्सीलेंस स्थापित कीता गेआ ऐ। एह क्लीन एनर्जी सिस्टम गी होर भरोसेमंद, कुशल ते सुलभ बनाने च मदद करग।

<><><><><>

PM-Bilaterals

प्रधानमंत्री नरेंद्र मोदी होरें अज्ज नमीं दिल्ली दे भारत मंडपम च ब्रिक्स शिखर सम्मेलन-2026 दे मौके पर कजाकिस्तान दे राष्ट्रपति कासिम जोमार्ट टोकायेव हुंदे कन्नै दपक्खी बैठक कीती। प्रधानमंत्री मोदी होरें मिस्र दे राष्ट्रपति अब्देल फतह अल सीसी ते फिलीपीन्स दे राष्ट्रपति फेडरीनंद आर. मार्कोस कन्नै बी बैठकां कीतियां। प्रधानमंत्री होर पिछले दो दिनें थमां दुनिया दे बक्ख-बक्ख मुलखें दे नेताएं कन्नै लगातार दपक्खी बैठकां करा'रदे ना।

<><><><><>

PM-Climate Disasters

प्रधानमंत्री नरेंद्र मोदी होरें अज्ज आखेआ जे महामारिएं, जलवायु सरबन्धी आपदाएं ते सप्लाई चेन च रुकावटें एह दस्सी दित्ता ऐ जे अज्जै दी इक-दुए कन्नै जुडी दी दुनिया च कोई बी संकट छड़ा इक खेत्तर तगर गै सीमित नेई ऐ। नमीं दिल्ली दे भारत मंडपम च ब्रिक्स शिखर सम्मेलन दुरान बोलदे होई मोदी होरें आखेआ जे इसी ध्यानै च रखदे होई गै ब्रिक्स मुलखें आपूं च तालमेल गी बढ़ावा देने पर ध्यान केंद्रित कीता ऐ। लचीलापन, नवाचार, सहयोग ते स्थिरता सरबन्धी सत्र च प्रधानमंत्री मोदी होरें चुनौतिएं दी तौले पंछान करने, उंदे लेई तैयार रौहने ते तुरत कार्रवाई करने दे महत्व पर जोर पाया।

<><><><><>

Dryland-Congress

त्रै रोजा ड्राइलैंड कांग्रेस-2026 अज्ज नमीं दिल्ली च सम्पन्न होई गई। इस मौके पर सुके इलाकें च राईबाई आस्तै समाधानें गी तेज करने लेई ग्लोबल साउथ दे मुलखें बश्कार दक्खन-दक्खन ते त्रिकोणीय सहयोग होर मजबूत करने दा आह्वान कीता गेआ। कृषि ते करसान कल्याण मंत्रालय नै आखेआ ऐ जे इस आयोजन दे खीरै च ड्राइलैंड उप्पर दिल्ली घोशणा पत्र गी अपनाया गेआ। घोशणा पत्र च ग्लोबल साउथ मुलखें बश्कार सहयोग जन दे आदान-प्रदान, नवाचार ते सांझी कार्रवाई दे जरिये सुके इलाकें दी राईबाई गी बदलने आस्तै इक सांझा एजेंडा तय कीता गेआ ऐ।

<><><><><><>

Shah Manuscript Exhibition

केंद्री गृह ते सहकारिता मंत्री अमित शाह होरें अज्ज मुम्बई दी एशियाटिक सोसायटी च पांडुलिपियें दी खासतौरा पर तैयार कीती गेदी प्रदर्शनी श्री गणेश ज्ञान आरती दा उद्घाटन कीता। इस मौके पर लोकें गी संबोधित करदे होई श्री शाह होरें आखेआ जे भारत कोल समृद्ध ते प्रकाशमान ज्ञान परम्परा ऐ ते जेदी लोड़ पूरी दुनिया गी बत्त दस्सने दी क्षमता रखदी ऐ। उनें आखेआ जे ज्ञान दी एह विरासत भारत गी अपने इतिहास च होए दे बदेशी हमलें दे बावजूद अपनी पंछान ते सभ्यता गी कायम रखने च समर्थ बनांदी रेई ऐ। श्री शाह होरें एशियाटिक सोसायटी गी अपील कीती ऐ जे ओह आधुनिक तकनीक दा इस्तेमाल करियै अपनी ज्ञान दी इक अमूल्य धरोहर गी देस भरै दे लोकें तगर पजाने दी कोशश करन।

<><><><><><>

Railways Growth

भारती रेलवे नै अगस्त-2026 च माल ढोने दे मामले च पिछले बरे दे मकाबले 5 अशारिया 4 फीसदी दा बाद्दा दर्ज कीता ऐ। अगस्त-2026 च रेलवे नै 13 करोड़ 79 लख टन माल ढोआ ऐ जेल्लै के अगस्त 2025 च एह आंकड़ा मात्र 13 करोड़ 9 लख हा। रेल मंत्रालय नै जानकारी दिती ऐ जे अगस्त-2026 दुरान माल ढोने थमां होई दी आमदनी च अगस्त-2025 दे मकाबले 6 अशारिया 2-7 फीसदी दा बाद्दा होआ ऐ। एह भारती रेलवे दे माल ढोआई कारोबार च लगातार होआ'रदी मजबूती गी दर्शादा ऐ।

<><><><><><>

IMD

भारती मौसम विभाग नै गुजरात च मौलेधार बरखा पौने दा रेड अलर्ट जारी कीता ऐ। मध्य महाराष्ट्र, सौराष्ट्र, कच्छ, तेलंगाना, विदर्भ ते मध्य प्रदेश च बी तेज बरखा दा ओरेंज अलर्ट जारी कीता गेआ ऐ। कल तगर दिल्ली, हरियाणा, चंडीगढ़, पंजाब पूर्वी राजस्थान ते पच्छिम बंगाल दे तराई आहले इलाकें च बी तेज बरखा होई सकदी ऐ। स्टाडे संवाददाता नै दस्सेआ ऐ जे नवसारी ते बलसाड सने केई जिलें कन्नै दमन ते दादरा नगर हवेली च बड़ी मती बरखा दा रेड अलर्ट जारी कीता गेआ ऐ। पिछले 24 घंटें च जोरदार बरखा होई ते 193 तालुकाएं च बरखा दर्ज कीती गई।

<><><><><><>

JK Weather

मौसम विभाग ने जम्मू-कश्मीर च कल तगर मौसम दे आमतौरा पर खुशक रौहने ते कुसा-कुसा थाहर हलकी बूँदा-बूँदी होने दी पेशनगोई कीती ऐ। ऊआं अज्जै थमां 16 सितम्बर दे बश्कार केई थाहरें बडुलै ते दपैहरी हल्की बरखा पेई सकदी ऐ। एहदे मगरा 17 शा 20 सितम्बर तगर आमतौरा उप्पर मौसम खुशक गै रौहग पर ऊआं कुसा-कुसा थाहर हौली बरखा बी पेई सकदी ऐ। मौसम विभाग दे सेअऊ ते मूंजी दी खेती करने आहले करसानें गी औने आहले दिनें दुरान मौसम स्थावै कम्म करने लेई आखेआ ऐ।

<><><><><><>

Bihar Flood Situation

बिहार च हाड़ दी स्थिति च बल्लें-बल्लें सुधार होआ करदा ऐ ते केई नदियें दे पानी च कमी दर्ज कीती गई ऐ। हालांकि पंदरां जिले च अजें बी हाड़ दा असर बरकरार ऐ ते केई इलाकें च जिमी खिसकने दा खतरा बने दा ऐ। राहत ते बचाव अभियान जारी न। बिहार दे केई जिलें च हाड़ दी स्थिति च सुधार होआ करदा ऐ। गंगा, गंडक, पुनपुन, सोन ते बागमती नदियें दे जल स्तर च केई निगरानी केंद्रें च कमी दर्ज कीती गई ऐ। हाड़ कन्नै 575 ग्रांउ पंचैतें च 48 लख थमां मते लोक प्रभावित होए न। पटना दे गांधी घाट ते दीधा घाट पर गंगा दा जल स्तर लगातार इक स्तर उप्पर बधा करदा ऐ।

<><><><><><>

AI-Industry

एंथ्रोपिक दे सीईओ डारियो एमोडेई होरें आर्टिफिशल इंटेलीजेंस उद्योग दे तेज विकास गी थोड़ा आस्ता करने दी अपील कीती ऐ। उनें आखेआ जे तकनीक कन्नै गैऽ मलाने आस्तै सुरक्षा उपाएं गी बी पूरा समां मिलना जरूरी ऐ। एमोडेई होरें चेतावनी दिती ऐ जे मजबूत सुरक्षा उपाएं दे बगैर ए.आई अगले 6 थमां 12 महीनें दे अंदर-अंदर इक ऐसे झुंड दा नेतृत्व करने च समर्थ होई सकदा ऐ, जेड़ा संभावित तौरा पर इंटरनेट उप्पर कब्जा करी सकदा ऐ। उनें इस कन्नै जुड़े दे होर बी केई खतरें दा जिक्र कीता। उनें एहू बी आखेआ जे ए.आई दा विकास जारी रौहना चाइदा ऐ, पर इस कन्नै जुड़े दे खतरे गंभीर न ते कंपनियें ते सरकारें गी इनें खतरकें कन्नै निब्वड़ने आस्तै समां चाइदा ऐ।

<><><><><><>

WHO-New Delhi Declaration

विश्व स्वास्थ्य संगठन-डब्ल्यूएचओ नै ब्रिक्स मुखें आसेआ ब्रिक्स शिखर सम्मेलन-2026 दुरान अपनाई गेदी नमीं दिल्ली घोशणा यानि न्यू दिल्ली दिल्ली डिक्लेरेशन दा सोआगत कीता ऐ। डब्ल्यूएचओ दे महानिदेशक टेड्रोस अधानोम होरें सोशल मीडिया पर इक पोस्ट च Universal Health Coverage/ Resilient health system ते महामारी समझौते पर गल्लबात सफलतापूर्वक पूरी होने आस्तै ब्रिक्स मुखें दी प्रतिबद्धता दी सराहना कीती। उनें इस शिखर सम्मेलन दुरान गर्मजोशी कन्नै सोआगत करने लेई प्रधानमंत्री नरेंद्र मोदी हुंदा आभार बी जताया।

<><><><><><>

Indonesia Ferry Missing

इंडोनेशिया च खराब मौसम करी जावा सागर च 240 थमां मते यात्रिएं गी लेइयै जा'रदी किशती पलटी गई। हादसे च 6 लोकें दी मौत होई गई, 140 यात्री ते चालक दल दे सदस्य अजें बी लापता न। इंडोनेशिया बचाव दल नै अजें तगर 102 लोकें गी बचाई लैता ऐ। नौका पूर्वी जावा थमां दक्खन कालीमंतन जा'रदी ही ते सुराबाया थमां बोर्नियो द्वीप दे बंजारमासिन आस्तै रवाना होई ही। इंडोनेशिया 17 जहार थमां मते द्वीपें आहला मुख्य ऐ जित्थे किशती यातायात दा इक प्रमुख साधन ऐ।

<><><><><><>

Army Commander South Kmr

उत्तरी कमान प्रमुख लेफ्टिनेंट जनरल प्रतीक शर्मा होरें दक्खनी कश्मीर च आतंकवाद रोधी तंत्र मौजूदा सुरक्षा स्थिति ते कम्मै कारवाइएं दा जायजा लैता। लेफ्टिनेंट जनरल शर्मा होरें गी पूरी पराती सुरक्षा स्थिति दी जानकारी दिती गई। सेना कमांडर होरें स्थिति स्हाबै अपने आपा गी तैयार रखने, सौहार्द सतर्क रौहने ते आपुं'चै नेडमा तालमेल बनाइये कम्म करने पर जोर पाया। उनें आखेआ जे एह्दे कन्नै बेहतर ते कारगर ढंगै सिर पैदा होई सकने आहली कुसै बी चुनौती कन्नै निब्वड़ेआ जाई सकदा ऐ। बलें कन्नै गल्लबात दुरान उनें उंदी भावना, निष्ठा ते दलेरी कन्नै झूटी गी अंजाम देने लेई सराहना कीती। उंदी इससै निस्वार्थ सेवा करी खित्ते गी आतंकवाद मुक्त बनाने च खित्ते च शांति ते रमानदारी बहाल करने च मदद थ्हांदी ऐ।

<><><><><><>

Men-Cricket

मर्दे दे क्रिकेट च अज्ज भारत अफगानिस्तान कन्नै त्रै टी-20 अंतरराष्ट्री मैचें दी श्रृंखला दा पैहला मैच खेडोगा। एह मैच दिल्ली दे अरूण जेटली स्टेडियम च संझा 7 बजे थमां खेड्डेआ जाह्ग। दुआ मैच मंगलवारें ते त्रिया मैच वीरवार होग। सारे मैच दिल्ली दे अरूण जेटली स्टेडियम च होडन। श्रेयस अय्यर भारती टीम दे कप्तान ते तिलक वर्मा उप कप्तान होडन। भारत दी तरफा जसप्रीत बुमराह, अर्शदीप सिंह ते यश ठाकुर तेज गेंदबाजी दी कमान संभालडन।

<><><><><><>

Women's T-20 Asia Cup

महिला टी-20 एशिया कप क्रिकेट फाइनल च अज्ज दुबई च भारत दा मुकाबला मौजूदा चैंपियन श्रीलंका कन्नै होग। एह मैच भारती समें मूजब रातीं 8 बजे शुरू होग। भारत ते श्रीलंका दवें टीमां बिजन कोई मैच हारे दे फाइनल च पुजियां न। 7 बारी दी चैंपियनयन भारती टीम नै ग्रुप-ए च टाप करदे होई ते सेमीफाइनल च बांगलादेश गी 40 रन कन्नै हराइयै फाइनल च थाह बनाई। श्रीलंका बी ग्रुप-ए च अजय रेआ। श्रीलंका नै सेमीफाइनल च पाकिस्तान गी 4 विकट कन्नै हराया। 7 खताबें कन्नै भारत महिला एशिया कप दे इतिहास दी सबनें थमां सफल टीम ऐ।

<><><><><><>